

Iudi peba titi owera ie kimibiria urubia aboto

¹ Mo Iudi ie, nedi peba titi owera ro mo ro nisioidiro Iesu urubia aboto. Mo Iesu Keriso wisa tato woko dubu e, ibose mo Iemisi neama ie.

Godi ro edi urubia girapoi nou ia urubia to ararasoro ri, nedi peba titi ro nio ia aboto nisioidiro. Nio Abera Godi ro ta-gidabuai, nio nou ro nirimagare imatiti-die. Nio Godi ro ubauba aboudo tiwasioutititi womu tato Iesu neito namadi-orowameai-ri.

² Wisa tato kiwarebai tanaro, miro, nirimagare nio niro turi ato auna se ba-miamotiti.

Iudi ro nedi peba titi ro etou mabu rido gisioidiro

³ Namuturubi nirimagare babio, kebase mo ubi ta-gowamo ata owera nio aboto emeiriai ri. Nimo Iesu Keriso sapuwo to na-nimibiria-rimo, nimo Godi ro nou sapuwo to niapopo-ro ubauba aboudo. Ina mo ubi ie nedi kiapopo tanaro ro owera nou sapuwo to kisioidiro. Kaupoti nedi tanaro ro mo ro osioidiro pua. Mo ina na-nimaragoidiro modobo ie mo ro peba titi aise kisioidiro nio umoro kiwai sapuwo to. Nio mo ro abora binio to nou ri nimagege koko se irimowotoi ri, morobise owera Iesu Keriso sapuwo to na-nimibiria-rimo nimo ro nou kowairiawado modobo ie. Godi ro nedi morobise owera ro nou edi tarena urubia ro

neio aboto kaupoti tau to imese gaiwai-ro imese tau sapuwo to.

⁴ Modobo pua nedi morobise oweru ro arua urubia ro ata mino to kowauti. Nio aboto nedi umoro oweru ro mo ro nou ri nisioidiro, mabu nio aboto arua urubia piro se ta-giririmudurai-dioumo. Neio nakara se aro-dumo ibo neio kimibiria urubia ie, kaupoti neio aratigi-dumo kimibiria urubia to na-wararasoro-dumo. Nedi urubia ro neio sapuwo to Tarena Buka ato kebase giwapotai-rimo ibo, neio Godi ro ubauba wisa ama-imio-ri. Neio ro Godi emaragoidiro-titi pua. Nedi urubia ro neio ro Godi edi wisa tato nirimagare ro ubauba mino to ewesegerewado-dumo. Neio ibo imaragoidiro-titi-dumo siripo tanaro auna se kisioidiro modobo ie. Abera Naramu Iesu Keriso nimo ia kaupoti eputa dubu nou se ie. Kaupoti nedi urubia ro Iesu Keriso neio ro emowabetiti-dumo.

Pikisa oweru ie bagea kimibiria urubia sapuwo to

⁵ Ina nio umoro sapuwo to nio kebase umoro ta-goi-rimo netewa didi tanaro peteibi keba ia se na-gororosioi-di-ro-birimo. Mo ubi ie nio mo ro ina umoro kiwai. Isiraere urubia wisa tato woko na-isioi-di-ro-titi-mo Isipi duriomoro ato, neio Abera Naramu ro mea mino to giwosuruwo-ro. Neio na-woutiti-rimo ipi ato, arua ro nou oweru imibiria pua. Taie nou mabu ato ie neio Abera Naramu ro aise iopiautititi.

⁶ Ibose arua sowake urio sirio nio ro ma-dimaragoidiro-mo, neio erere woko Godi ro ta-gimio mea mino to isioi-di-ro ri. Kaupoti neio

ro Godi ubi tanaro a-gimasaudai-rimo. Neio arua simara mea komidiro duriomoro ro imese gemeserai-rimo. Ina noudo ie neio Godi ro sisibo ia ibi gugu to neito giwodoro womu tato womu tato seni to na-gimatahiriawado iato aise tirowomidititi. Neio ro edi auna koto saiki ro nou emotoititi-dumo, ina ioudo namadi-iwosuruwo-ri taie era paruo to aise ama-iherai-ri.

⁷ Ina ibose mo ubi ie nio umoro kiwai Sodom ra Gomora ra sabowa teibo arua sabowa mutu gomo ato na-giamo, neio aboto beda ubauba tanaro ro gororosioidiro-rimo. Nimo neio aboudo keremoputi modobo ie womu tato womu tato era paruo sapuwo to, mabu neio ro imese ata sosoro siripo tanaro auna ia se isioidiroititi-mo.

⁸ Iedi karasaubuti urubia ro nio aboto na-godoro-rimo, neio ro idaibo tanaro tisioidiro-dumo, durupi nakara se ubauba irimowaititi-dumo arua urubia mutu na-irohotiti-dumo. Mabu neio bagea hiwo owerato iremowautiti-dumo ibo, 'Nio ro nedi tanaro ro ba-disioidiro-mo, ubauba tato ie.' Ibose nedi urubia ro neio ubi tato ie Godi owerakirowidiro, auna se ibeoutiti-dumo. Neio ro owerato sowake urio sirio ubauba iwaititi-dumo.

⁹ Keba ia tau ato Godi edi sowake urio ro auna to edi na ro ararasorotiti Maikoro, Mose pamo durupi kemoba sapuwo to nu Satani mutu owerato ta-gararaudurai-rido. Maikoro nu auna sekere ie, kaupoti Satani nou ro owerato ubauba nato owai pua. Nou ro ibo, 'Oro ubauba wisa Abera Naramu ro ama-omia-ri.'

¹⁰ Nedi karasaubuti urubia ro ata sosoro ie.

Neio ro sowake urio umoro oi pua, ina neio ro oweru to ubauba iwaititi-dumo. Nedi urubia ro neio soka ra giro ra sosoro irohotiti-dumo, kimaragoidiro to etou tanaro kiraremaidiro ra, iedi tanaro ro dorogora se aise kosoidiro ie. Neio ro idaibo mino to pamo oworoho-dioumo keremiro imese moro to kiporeai aboto.

¹¹ Auna ia ubauba nedi urubia ro neio aboto ama-ereredeai-ri, mabu neio ro Keina edi gabo ro nato gotobowa-dumo simara neama na-gopia. Neio ubauba maumo to imese godoro-rimo, Baramu beda sosoro gosoidiro. Neio auna ubi ie mani kimade, Baramu ro beda sosoro gosoidiro, Isiraere urubia isarena na-gimaiwai-rimo. Ibose Kora ro urubia ta-gimudo Abera Naramu oweru neio ro a-giwaruria-rimo, ina Godi ro neio nou ri gipisiamuti. Nedi karasaubuti urubia ro urubia neio ro ibose to imudo-dumo Godi oweru iwaruriauti ri, ina ibose nedi karasaubuti urubia ro Godi ro ama-ipisiamuti-ri.

¹² Karasaubuti kimibiria urubia nio mutu na-waradabu-dumo, nedi karasaubuti urubia ro nio neio ro marea iwaititi-dumo. Nedi ohona ro neio ro siripo mutu iho-ri pua, arua urubia aboto imaragoidiro-ri pua. Ibose nedi urubia ro ubauba sipisipi kimowotoi urubia sosoro ie. Neio simara durupi eremaragoidiro-ri-dumo, sipisipi mea se imowotoi-ri pua. Nedi urubia ro neio nakara se orowarebaititi-dumo, arua urubia neio ro iwarebai-ri pua. Saiki auna se kotobowa ato neio daroho bubu sosoro ie, gawia kihudurai ato daroho aise eretei-ri pua. Mabu neio ro bagea oweru karo ie, tanaro aise ororosoidiro-ri pua. Nedi urubia ro deimi ota

sosoro ie, deimi iopu simara tau ato iasesuti-ri pua, sipi mutu ta-gaubai-rimo, imese pamo ia ie.

¹³ Nedi urubia ro bukopu eputa sosoro ie, nedi bukopu gesagesa ro ota petata, ota puara soso mutu, poto to aise kiwidiawado ie. Nedi urubia ro siripo tanaro idaibo mino to isioidirotiti-dumo. Idaibo urubia owera aise irowidiro mamu, mabu neio kerewai kerewai kiboni sosoro ie. Idaibo tanaro urubia Godi ro kebase ta-gimohodowa duwoduwo ia ibi gugu neio womu tato womu tato iato ama-irowomidirotiti-ri.

¹⁴ Inoki orora ie Adam. Nou 6 nasaio kebase ta-gorowomidiro ina nu 7 ie. Nedi karasaubuti urubia ro abora na-owomidiro neio kebase Inoki ro ta-giwapotai-ro ibo, 'Owera nou e neito ma-dirowidiro-rimo! Abera Naramu imese sirio ia tarena sowake urio mutu amadi-ou-ri, ota puara mororobiritai-rimo kioputi modobo pua.

¹⁵ Urubia sirio koto iwai ri amadi-ou-ri, ina ubauba tanaro kisioidiro urubia ubauba nato ama-iwai-ri. Idaibo Godi tere kemati tato urubia neio Abera Naramu ro paea se nato ama-imowapotaiddiro-ri ibo, "Nio ubauba tanaro kisioidiro urubia ie. Nio ro Godi sapuwo to ubauba owera ta-iarotiti-mo." '

¹⁶ Nedi urubia ro mouro owera auna se karo ie, ibose auna kimowameduti urubia ie. Neio abato edi ubauba ubi ro na-iamotiti, neio ubauba to neio ro iwaguwo-dumo. Neio karasaubuti urubia ie keremowabu auna ie. Neio auna ubi ie arua urubia owera meamea to kiageawado.

¹⁷⁻¹⁸ Namuturubi nirimagare babio, nio ro ma-dimaragoidiro-mo nimo Abera Naramu Iesu

Keriso edi kitiodorai urubia ro neio ro beda oweri iaretiti-mo nio aboto, ibo ido etou tanaro ro amadimo-ororosioi-di-ro. Neio ro ibo, 'Iana tau namadi-orobai-ri, keremasosowado urubia amadidimo-ou-ri, neio Godi tere kemati tato urubia ie, simara ubauba ubi gabo amadimi-ibodoro-ri.'

¹⁹ Nedi urubia ro nio abato torowomidi-ro, neio durupi edi ubauba ubi tanaro ro dorogora se aise kisioidi-ro ie. Neio niro turi ato Godi edi Tarena Urio ro omidi-ro pua. Ina noudo ie nio neio ro ihoduti-dumo.

Pupuwu keremowaititi modobo ie

²⁰ Namuturubi nirimagare babio, nio ro tarena oweri ta-gimibiria-rimo. Ina nedi kimibiria tanaro ro moto posi sosoro ie. Mea se nato ba-dididi-mo nio kimibiria pupuwu kiwaititi sapuwu to. Ibose nio Godi mutu keremowauti ato nio Tarena Urio ro ba-miwaboidi-ro.

²¹ Abera Naramu Iesu Keriso nou edi nirimagare ro ba-demasebidi-ro-mo, nio womu tato womu tato keremiro nou ro nama-imio-ri. Idaibo tanaro nio ro namadimi-isioidi-ro-ri, Godi edi nirimagare ro amadime-emaragoidi-rotiti-ri, ina nou maumo ato mea se ama-irowomidi-ro-ri.

²² Kimibiria urubia kimaragoidi-ro teibo na-iworohuti-madumo, neio nio ro nirimagare kimati modobo ie.

²³ Ibose arua urubia era paruo to ou-dumo era ato aratowo ri. Nedi urubia ro nio ro hio ito diwagarewado-rimo, modobo pua neio era ro kioura. Ina arua urubia nio abato torowomidi-ro karasaubuti oweri neio ro ta-gimibiria-rimo, neio nio ro nirimagare kimati modobo ie. Kaupoti mea se! Modobo pua nedi atu ubauba

ro nio neito kodoro. Neio ro edi ubauba tanaro
ro na-isioidiro-dumo, nio ro binio to nou
ba-dimowabeouti-mo.

Godi masiro ohu to mowoubua-rimo

²⁴ Nio Godi aboudo keremeseruti ato ubauba
tanaro isioidiro ri, nou aboudo gabo towamo-die
nio kiwasiouti ubauba tanaro kisioidiro aboudo.
Ina ibose nou edi woroworo ato na-imidirotiti,
nou abato pupuwo towamotiti nio nou ro neito
kiwateai aboto. Nio ata ubauba tato
ama-orowotoi-ri, auna kamade mutu.

²⁵ Godi kaupoti nouse ie nou ro nimo ubauba
aboudo ta-niapopo-ro Abera Naramu Iesu Keriso
na-gemeiriai-ro neito. Imese meana ia, imese
auna ia, imese pupuwo ia, imese auna ia masiro
nou abato ba-miamotiti. Duriomoro ido to
gosioidiro nou abato ta-iamotiti, ibose nou do to
amadima-ararasoro-ri womu tato womu tato.
Ibose ba-mororsioidiro-mo.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4